

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 450972 23 St
Tuzla, 18.03.2024.godine

Općinski sud u Tuzli, sudija Antonela Đaković kao stečajni sudija u stečajnom postupku nad stečajnim dužnikom „EP AUFZUG“ d.o.o. Tuzla, ul. Zlatana Mešića br. 43, koje u svom sastavu ima podružnicu pod nazivom: „EP AUFZUG“ d.o.o. Tuzla, ul. Zlatana Mešića br. 43, Podružnica EP Investing, nakon provedenog prethodnog stečajnog postupka donio je dana 18.03.2024.godine slijedeće:

R J E Š E N J E

OTVARA SE stečajni postupak nad imovinom dužnika „EP AUFZUG“ d.o.o. Tuzla, ul. Zlatana Mešića br. 43, MBS: 1-11311, JIB:4209060490008, račun broj: 1995010059622229 otvoren kod Sparkasse Bank d.d BiH.

Za stečajnog upravnika imenuje se Besim Hamidović, Križevici 165, 75404 Gušteri, Republika Srpska.

ZAKLJUČUJE SE stečajni postupak nad imovinom dužnika „EP AUFZUG“ d.o.o. Tuzla, ul. Zlatana Mešića br. 43, koje u svom sastavu ima podružnicu pod nazivom: „EP AUFZUG“ d.o.o. Tuzla, ul. Zlatana Mešića br. 43, Podružnica EP Investing, zbog nedostatka stečajne mase za pokriće troškova stečajnog postupka.

Rješenje će se objaviti na Oglasnoj tabli suda, WEB stranici suda, Službenim novinama F BiH, te dostaviti FIA-i.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

O b r a z l o ž e n j e

Rješenjem Općinskog suda u Tuzli broj 32 0 St 450972 23 St od 14.11.2023. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „EP AUFZUG“ d.o.o. Tuzla, ul. Zlatana Mešića br. 43, koje u svom sastavu ima podružnicu pod nazivom: „EP AUFZUG“ d.o.o. Tuzla, ul. Zlatana Mešića br. 43, Podružnica EP Investing, a za privremenog stečajnog upravnika imenovan je Besim Hamidović iz Zvornika, a sve temeljem člana 61. Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 17.01.2024.godine. Iz izvještaja privremenog stečajnog upravnika proizilazi da društvo ne posluje i da nema uposlenika. Dužnik ne posjeduje nepokretnu imovinu obzirom da iz Uvjerenja izdatog od Grada Tuzla broj: 07-27-87926/23-2 od 04.12.2023.godine i potvrde od zemljišno knjižnog ureda Općinskog suda u Tuzli broj 032-0-RZ-22-002628 od 17.11.2023.godine proizilazi da nije upisan kao nosilac prava u katastarskom operatu niti kao

vlasnik nekretnina u zemljišnim knjigama Grada Tuzla, niti posjeduje pokretnu imovinu – pmv što proizilazi iz uvjerenja MUP TK-a Tuzla od 06.12.2023.godine.

Obaveze društva prema knjigovodstvenoj evidenciji iznose 1.340.848,90 KM, a odnose na obaveze prema ino dobavljačima („Labena“ d.o.o Slovenija), obaveze po kreditima (Addiko Bank d.d), prava iz radnog odnosa po presudama, pozajmice od fizičkog lica, advokatske usluge, kao i obaveze prema domaćim dobavljačima. Pored navedenog, privremeni stečajni upravitelj je utvrdio da je podnosilac prijedloga za otvaranje stečajnog postupka podnio prijedlog u roku od 60 dana od dana nastupanja platežne nesposobnosti, da postoji stečajni razlog za otvaranje stečajnog postupka predviđen članom 6. stav 2. i članom 102. Zakona o stečaju.

U smislu odredbe člana 103. stav 1., u vezi sa odredbom člana 102. stav 7. Zakona o stečaju F BiH („Sl. novine F BiH“ broj 53/21), a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je Javnim pozivom od 29.01.2024.godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama FBiH uplate iznos od 4.000,00 KM na ime otvaranja stečajnog postupka, iz kojeg predumjerenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica objavljeno je u Službenim novinama F BiH broj 12/24 dana 14.02.2024.godine, oglasnoj tabli suda dana 30.01.2024. godine i na web stranici suda.

Obzirom da u ostavljenom roku koji je propisan zakonom povjerioci ili neko od zainteresovanih lica nije izvršio uplatu preduma za finansiranje troškova stečajnog postupka, sud je u smislu odredbe člana 102. stav 8. Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102. stav 8. Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBiH i Upravi za indirektno oporezivanje BiH.

Nadalje, temeljem odredbe člana 204. stav 1. i 3., a u vezi sa odredbom člana 190. stav 10. Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti za FIA, dok je odredbom člana 204. stav 2. istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204. stav 5. Zakona o stečaju.

Na osnovu odredbe člana 206. stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102. stav 8. Zakona o stečaju sud je postupio kao u izreci rješenja.

Stečajni sudija

Antonela Đaković

POUKA O PRAVNOM LIJEKU:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu Tuzla, putem ovog suda, u roku od 8 dana, od dana objavljivanja rješenja u Službenim novinama.